

ЗАРНИГОР ЖАББОРОВА

Мен ўзбек қизиман

(Шеърлар)

МАЖБУРИЙ НУСХА

**ТОШКЕНТ
«ИСТИҚЛОЛ»
2013**

УЎК: 821.512.133-1

КБК: 84(5Ў)7 - 938.9008.

Ж-13

87(5Ў)7

Ж-13

Жабборова, Зарнигор.


Мен ўзбек қизиман: шеърлар / З.Жабборова —
Тошкент: Istiqlol, 2013. — 16 б.

*Самарқандлик ҳаваскор шоира Зарнигор Жабборова-
нинг китобхонларга тақдим этилаётган илк шеърый
тўпламига унинг ёшлик, она-Ватан, баҳорга бағиш-
ланган ижод намуналари киритилган.*

УЎК: 821.512.133-1

КБК: 84(5Ў)7

HD 41281
091



© «Istiqlol nashriyoti», 2013



ЙЎЛИНГ ОЙДИН БЎЛСИН!

Ёш истеъдод эгаси Зарнигор ЖАББОРОВА Тайлоқ туманидаги 31-мактабнинг 9-синф ўқувчиси. Таълим масканидаги аълочилар сафида унинг ўз ўрни бор. Синфдошлари, мактабдошлариям Зарнигорни табиат ошуфтаси, билимдон ва адабиётсевар ўқувчи сифатида ҳурмат қилишади.

Туман халқ таълими муассасалари фаолиятини методик таъминлаш ва ташкил этиш бўлими қошида хассос шоир Абдулла Нисорий раҳбарлигидаги «Чашма» адабиёт тўғарагига уюшган 40 нафардан ортиқ назм ва наср шайдолари сингари Зарнигор Жабборова ҳам ўқишдан бўш пайтларида инжудекпокиза кўнгил изҳорларини оппоқ қоғозга тўкишга, юрагида жўш ураётган ҳис-туйғуларини бадиий ифодалашга интилиб, бинойидеккина шеърлар ёзмоқда.

Зарнигор туман ва вилоят миқёсида ўтказиб келинаётган «Нафосат» кўрик-танловларининг доимий иштирокчиси. У ижоднинг машаққатли синовларидан муваффақиятли ўтиш учун мактабда олаётган билимларини синфдан ва мактабдан ташқари қўшимча сабоқлар билан мустаҳкамлашга интилаётир.

Келгусида яхши ижодкор бўлишга орзуманд қизимизга оқ йўл тилаймиз.

Тугалбой МУЗАФФАРОВ,
ёзувчи



ВАТАН

Томиримда урган қонсан, Ватаним,
Танамда барқ урган жонсан, Ватаним.
Қалбимни яйратган шонсан, Ватаним,
Фазилат, шукуҳга бойсан, Ватаним.
Вужудим, руҳимсан, бор-у йўғимсан,
Онамдек муқаддас ҳам улуғимсан.
Мусаффо осмонда тонг юлдузимсан,
Танамда барқ урган жонсан, Ватаним.
Ҳар зарра тупроғинг кўзга тўтиё,
Илм-фан булоқлари кўзимга зиё.
Пойингга тиз чўкиб қилай илтижо,
Маккаи Мадинам, жоним Ватаним.
Қаҳратон қишдаги бўронларингни,
Чўлларда саргардон шамолларингни.
Заминингда унган гиёҳларингни,
Бағрингда яшовчи жонзотларингни —
Юрагимга кўмай, меҳримни ўраб,
Пойингга йиқилиб, тизга урай лаб.
Онамдек муқаддас замин, Ватаним,
Жаҳонда тенгсизим, шоним Ватаним!

ЎЗБЕКИСТОН

Ибо-ю ҳаё бор ўзбек қизида,
Ор, номус, ғурур бор ўзбек ўғлида.
Зинҳор кўз тегмасин шундайин юртнинг,
Мустақил, хур, озод фарзандларига.
Боғларидан анқир жаннат ҳидлари,
Булоқлардан оқар зилол сувлари.
Жаҳонларда тенгсиз бўлган Ватаним,
Гуллаб-яшна Ўзбекистон, она юртим.



Юрагимда бир ўй, шукуҳ мужассам,
Сени жондек асраб-авайлағайман.
Дилимда меҳрингни тугиб доимо,
Фарзандлик бурчимни мен оқлағайман.
Онажоним берган оқ сут мисоли,
Она-Ватан, менга берган меҳрингни.
Дилим тубидаги гавҳар мисоли,
Мудом асрағайман, авайлағайман.
Жаҳонларга дoston бўлган номингни,
Довруғинг, шукуҳинг, истиқболингни —
Кўзим гавҳаридай асраб, авайлаб,
Порлоқ эртанг учун ҳисса қўшгайман.

ЎЗБЕК ҚИЗИ

Мен ўзбек қизиман, ҳур ва бахтиёр,
Мен обод юртимнинг эрка қизиман.
Бугун қўш қанотим — Ватан, юртбошим,
Жаҳон минбаридан янграр овозим.
Ўзбегим полвони узоқ юртларда,
Ўзбек мадҳиясин донгин таратган,
Юксак чўққиларни забт этиб унда,
Дунё нигоҳини бизга қаратган.
Жаҳон лолдир бугун ўзбек қизининг,
Билими, санъати, иқтидориға,
Тўмарис, Нодира, Зулфияларға,
Муносиб ворислар, издош бориға.

ШУКРОНА

Оллоҳим, мен сенга айтай шукрона,
Шу она заминга келганим учун.
Онажон, мен сенга айтай шукрона,
Кўз очиб дунёни кўрганим учун.



Отажон, мен сизга айтай шукрона,
Ҳаёт нелигини билганим учун.
Устозларим, сизга айтай шукрона,
Илм-у фан сирларин уққаним учун.
Шу мусаффо осмон, тинч ҳаёт учун,
Заминда унувчи ҳар гиёҳ учун.
Юртимни бошқарган юртбошим учун.
Ватанни асраган посбонлар учун,
Элим деб ёнувчи юраклар учун,
Мен сенинг қошингда эгиб бошимни,
Юз бора, минг бора айтиб шукрона,
Кўзим қароғида асрай Ватанни.
Толеим қуёши мангуға балқиб,
Сенга бор меҳримни берай, Ватаним.
Фидойи, заҳматкаш, эй, буюк халқим,
Сенга фидо менинг жон ила таним.

ОНАЖОН

Илк бор кулганимда қувонганим сиз,
Мен дард чекканимда ғам чекканим сиз.
Илк бор юрганимда қувончга тўлиб,
Қоқилган пайтимда турғизганим сиз.
Тенги йўқ, муқаддас дур, гавҳаримсиз,
Онажон, сиз менинг суянчиғимсиз.
Мен ўсдим, улғайдим, ўспирин бўлдим,
Ҳаётда яхши-ю ёмонни билдим.
Гоҳ ғамгин, гоҳ қувноқ ҳаёт йўлидан,
Юриш-чун энди мен йўлга отландим.
Тенги йўқ, муқаддас дур, гавҳаримсиз,
Онажон, сиз менинг суянчиғимсиз.
Юрагим тўрини сизга бераман,
Сўзларим сарасин сизга атайман.



Қалбимнинг қўри ҳам сизга бахшида,
Сўзимнинг навосин сизга атайман.
Тенги йўқ, муқаддас дур, гавҳаримсиз,
Онажон, сиз менинг суянчиғимсиз.

УСТОЗИМГА

Меҳр тўла қалб билан,
Билим бердингиз доим.
Хато қилсак, кечириб,
Сабр қилдингиз доим.
Мана, ўсиб-улғайиб,
Муносиб шогирд бўлдик.
Меҳрибоним, устозим,
Сизга мингдан-минг таъзим.

БИРИНЧИ ЎҚИТУВЧИМ

Муштоқ боқиб йўлларингга,
Мактаб томон чорлаган ким?
Қалам бериб қўлларингга,
«Алифбо»ни ўргатган ким?
— Биринчи ўқитувчим!
Қалбда меҳринг уйғотиб,
Ватанни севдирган ким?
Сабот солиб кўнглингга.
Меҳнатни ўргатган ким?
— Биринчи ўқитувчим!
Юрагимни ёндириб,
Парвозларга чорлаган.
Илҳом солиб кўнглимга,
Ижод сари йўллаган —
— Биринчи ўқитувчим!



МУСТАҲКАМ ОИЛА

Отам менинг давлатим,
Онам умрим савлати.
Акам суянган тоғим,
Укажоним қўргоним.
Опаларим қўлимда,
Бир даста райҳонларим.
Қавм-у қариндошларим —
Дўст-у ёр, ошноларим,
Дилкашим, дарддошларим,
Меҳрибон, сирдошларим.
Юрагимнинг тубидан,
Жой олган дилдошларим.
Оиламсиз, мустаҳкам,
Таянч бўлган Ватанга.
Жонингизга пайваста
Бўлсин менинг жонларим.
Озодлигим, ҳурлигим,
Истиқболим, нурлигим.
Шу эл, шу Ватанимга,
Садқа бўлсин жонларим.

БАҲОР

Ўлкамга келди баҳор,
Уйғониш фасли келди.
Қучоқ очиб навбаҳор,
Келинчак мисли келди.
Ҳаволар заҳрин сочган,
Қуёш нурин обқочган.
Булутлар кўз ёш қилган
Қиш фасли ортда қолди.



Қуёш заррин нурларин,
Ҳеч аямай сочмоқда.
Дехқон бобо ер бағрин,
Тилсимларин очмоқда.
Униб чиқар ерлардан,
Бизнинг ризқ-у рўзимиз.
Баҳор берар бизларга,
Бир йиллик насибамиз.

* * *

Баҳор келди, очилди,
Гул-чечаклар барчаси.
Қуёш кўкда қиздириб,
Қолмади қор зарраси.
Дарахтларнинг куртаги,
Чўзди митти қўлини.
Табиат — ёш келинчак,
Ёйди барча сепини.
Оқшоми жуда ёрқин,
Таралар хушбўй ифोर.
Ҳавоси жуда майин,
Осмон кўм-кўк, беғубор.
Уйғониш фасли — баҳор,
Ҳашамларинг сервиқор.
Нур сочиб сен дилимга,
Қутлуғ келгин элимга.

ДУНЁ

Бири камдир азалдан дунё,
Сенга раҳм қилмайди асло.
Юрагингда қувонч ва қайғу,
Иккаласи ҳамроҳдир аъло.



Гар қувонсанг, албатта қайғу,
Сени йўқлаб келар тўсатдан.
Кувонч сени юпата бошлар.
Қайғуларинг эзган фурсатда.
Баъзан ғамдан ўртанар юрак
Ташвишлардан ҳориб-толасан.
Аслида-чи? Инсонга баъзан —
Не керак деб ўйлаб қоласан...

ҲАЁТ СИНОВЛАРИ

Дунёда бойлик бахт дегани эмас,
Молу зар ўткинчи, алдамчи дунё.
Аслида хоҳ бой бўл, хоҳи камбағал,
Ҳаётда ўз ўрнинг топганинг аъло.
Ҳар бир банда хато қилар ҳаётда,
Умримиз камчилик, нуқсдан иборат.
Аммо, хатолардан чиқарсак сабоқ,
Тўғри йўлимизга қайтиш осонроқ.
Ҳаёт синовларин кечирган инсон,
Ўткинчи ғамларни енгар ва чидар.
Элим деб, юртим деб фидо этар жон,
Омад, роҳат ва бахт эшигин очар.

ТИНЧЛИК

Қўлига «Эрк!», дея қуролин олган,
Ўғли келиб қолар урушдан балким...
Жигарбандларидан айрилиб қолган,
Она сўроғини тингламаган ким?
Вафодор келинчак ёрин кузатган,
Ҳимоя қилмоққа она-Ватанни.
Водариғ, жанггоҳлар домига ютган,
Йигирма миллион қурбонлар қани?



Хиёбон четида хотира-қадр,
Номаълум жангчига қўйилган ҳайкал.
Бунда ҳаловатсиз изғийди сабр,
Фидойи ўғлонлар васлига маҳтал...
Хотира — абадий, жасорат — мангу,
Тинчликка пойдевор суронли онлар.
Бугун ҳур ва шодон ҳар жонда кулгу,
Юртга мустақиллик келди, ёронлар.
...Номаълум жангчининг мардлиги, шони,
Қўриқлар нотагон, нотинч дунёни.

СЎНГГИ ҚЎНҒИРОҚ

Чалинади сўнги қўнғироқ,
Юракларда қандайдир титроқ.
Кўзларда-чи, йилтирайди ёш,
Чалинмай тур, сўнги қўнғироқ!
Соат, сен ҳам тўхтагин бир зум,
Ташлаб кетма мени йироққа.
Хайрлашиш қандайин оғир,
Чалинмай тур, сўнги қўнғироқ!
Дўстлар билан ўтган тўққиз йил,
Синфхоналар менга сирдошдир.
Чидай олмам мен бу фироққа,
Чалинмай тур, сўнги қўнғироқ!
Бирга бўлдик қувонч, қайғуда,
Устозларнинг олиб таълимин.
Ташаккурга сўз топай, бир зум,
Чалинмай тур, сўнги қўнғироқ!
Устозларим, минг бор ташаккур,
Хуш қол, мактаб, хуш қол, синфдош.
Хайрлашмоқ онлари яқин,
Чалинавер, сўнги қўнғироқ!



ТУШ

Тонгда салқин шаббода,
Эсарди хушҳол, майин.
Рақсига бўлиб шайдо,
Тераклар чалар найин.
Қизгинанинг сочлари,
Тебранар шамолдайин.
Хаёллари чалкашиб,
Сескантирар ёвдайин.
Тунда кўрган тушларин,
Шамолга айтар секин:
«Олиб кетинг тушларим,
Тушдаги кўрқинчларим»...

АЛЛА

Тун ярмидан ошганда бешак,
Туриб кетдим бугун беҳосдан.
Тебранарди гирчиллаб бешик,
Алла айтар онам юракдан.
Шу куй мени айлади шайдо,
Бошим қайта қўйдим болишга.
Осмондаги юлдузлар мисол,
Яна кўзим кетди уйкуга.

ТОПМАДИМ

Дарё кечиб, тоғ ошдим,
Боғ-у роғларни кездим.
Чўл-у саҳроинг севиб,
Ўхшаши йўқлигин сездим,
Сенинг каби, Ватаним.



Меҳмон келса эшикдан,
Қўли кўксида бўлган.
Борини тўкиб солган,
Меҳмондўст халқ топмадим,
Сенинг каби, Ватаним.
Қилса тў-ю тантана,
Кўчиб борар маҳалла.
Кўнгли кенг, сиғар ҳамма,
Бағрикенг халқ топмадим,
Сенинг каби, Ватаним.
Бешигида боласи.
Тунлар бедор онаси.
Янграб турар алласи,
Болажон халқ топмадим,
Сенинг каби, Ватаним.



Ҷамъа

Ўқинч

Мана, оламни заррин нурлари ила чўмилтириб хузурбахш тонг отмоқда. Қишлоқнинг бир четидаги қуёшга юз тутган уйнинг деразасидан ичкарига мўралаётган ёруғлик тўшакда ухлаб ётган 13 — 14 ёшлар чамасидаги кўҳликкина қизнинг юзларини сийпалаб ўтди. У уйғониб кетди. Аллақачон тонг отиб улгурганини кўриб, сапчиб ўрнидан турди. Шу пайт онасининг:

— Гулсанам, тур қизим, мактабингга кеч қола-сан, — деган сўзлари эшитилди...

Қишлоқда баҳор ўз сепини ёйиб улгурган, атроф кўм-кўк либосга бурканган. Дарахтлар гуллаб, барг ёзмоқда. Бу манзаралар кишига илҳом бахш этади. Мактаб биноси анча узоқда жойлашган, хилват йўл хушманзара дарахтлар билан қопланган.

Дурбек ҳар нарсага қизиқувчан, зийрак бола эмасми, кета-кетгунча опасини саволларга кўмиб ташлади:

— Опа, нега дарахтлар баҳорда гуллайди?

— Табиатнинг уйғониш фаслида дарахтлар гуллайди, мева тугади, ёз ва кузда ҳосили пишиб-етилади, - деди опаси.

— Эй, опажон, табиат ҳам ухлайдими? - деди яна Дурбек.

— Ҳа, она табиат ҳам қишда уйқуга кетади, дарахтлар ҳам дам олади, — деб жавоб берди Гулсанам.



Шу пайт улардан сал узоқроқда бир машина тўхтади.

Машина эшигидан яшигина кийиниб олган бир амаки тушди-да, юкхонани очди. Ундан иккита қопни олиб, йўл четига улоқтирди. Сўнгра машина-сига ўтириб, жўнаб кетди.

Гулсанам қоплар олдига келиб қараса, улар йиртилиб кетган, атрофга эса ифлос чиқиндилар сочилиб ётарди.

Бунни кўрган укаси:

— Опажон, у ёмон амаки экан-а, унинг устози йўқми, унга атрофни тоза сақлашни, қишлоқни ободонлаштиришни ўргатмаганми? — дея чулдирай кетди.

Гулсанам эса куни-кеча синфдошлари билан биргаликда устози бошчилигида йўл чеккаларини, ариқларни тозалаб чиққанликларини эслаб, юрагида аллақандай бир ўкинч сезд.

Эҳ, амаки, амаки, наҳотки сиз шу мурғак укам-чаликҳам фикрлай олмасангиз, — деб куйинди.

МУНДАРИЖА

Йўлинг ойдин бўлсин!	3
Ватан	4
Ўзбекистон	4
Ўзбек қизи	5
Шукрона	5
Онажон	6
Устозимга	7
Биринчи ўқитувчим	7
Мустаҳкам оила	8
Баҳор	8
Дунё	9
Ҳаёт синовлари	10
Тинчлик	10
Сўнгги кўнғироқ	11
Туш	12
Алла	12
Топмадим	12
Ўкинч	14

Адабий-бадний нашр

Зарнигор ЖАББОРОВА

МЕН ЎЗБЕК ҚИЗИМАН

(Шеърлар)

Тошкент — «Истиқдол» — 2013

<i>Муҳаррир</i>	Ф. Раззоқова
<i>Рассом</i>	Ҳ. Ёқубов
<i>Мусахҳиҳ</i>	Н. Атабоева
<i>Саҳифаловчи</i>	С. Пўлатов

Лицензия рақами А1 № 217. 03.08.2012 й. Босишга рухсат этилди 18.04.2013 й. Бичими 84×108^{1/32}. Шартли босма табоғи 1,0. Адади 100 нусха. Офсет қоғози. Буюртма № 15.

«ISTIQLOL NASHRIYOTI», Тошкент ш., 100129, Навоий кўчаси, 30-уй. Тел: 244-94-36, факс 244-51-98. E-mail: rojpoligraf71@yahoo.com.

«ISTIQLOL NASHRIYOTI» матбаа бўлимида чоп этилди. Тошкент ш., 100129, Навоий кўчаси, 30-уй.